

2017 Rhif (Cy.)

ADDYSG, CYMRU

**Rheoliadau Addysg (Cyflenwi
Gwybodaeth am y Gweithlu
Ysgolion) (Cymru) 2017**

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn yn gosod gofynion ar ysgolion yng Nghymru, awdurdodau lleol yng Nghymru a Chyngor y Gweithlu Addysg ("y Cyngor") i gyflenwi gwybodaeth sy'n ymwneud â gweithwyr cymhwysol neu hyfforddeion cymhwysol (fel y diffinnir "qualifying worker" a "qualifying trainee" yn adran 113(2) a (3) o Ddeddf Addysg 2005 ("Deddf 2005")).

Bydd yr wybodaeth a all fod yn ofynnol yn rhinwedd y Rheoliadau hyn yn cael ei defnyddio'n bennaf ar gyfer dadansoddi ystadegau a gwneud gwaith ymchwil a bydd yn helpu i ddatblygu polisiau mewn perthynas â'r gweithlu ysgolion.

Effaith rheoliad 4 yw bod awdurdod lleol yn cael ei ychwanegu at y rhestr o bersonau a chyrff y gall fod yn ofynnol i berchennog ysgol gyflenwi gwybodaeth iddynt. Yn unol â hynny, mae rheoliad 5 yn ei gwneud yn ofynnol i gorff llywodraethu unrhyw ysgol a gynhelir, pan fydd yn cael cais ysgrifenedig oddi wrth awdurdod lleol sy'n cynnal yr ysgol, gyflenwi i'r awdurdod lleol hwnnw yr wybodaeth honno y cyfeirir ati yn Atodlen 1 y gofynnir amdani. Mae dyletswydd debyg yn rheoliad 6 sy'n ei gwneud yn ofynnol i awdurdodau lleol gyflenwi gwybodaeth y maent yn gofyn amdani i Weinidogion Cymru; a hefyd yn rheoliad 7 sy'n ei gwneud yn ofynnol i'r Cyngor gyflenwi gwybodaeth a nodir yn Atodlen 2 i Weinidogion Cymru.

Mae rheoliad 8 yn rhagnodi'r personau y mae Gweinidogion Cymru, at ddibenion adran 114(3) o Ddeddf 2005, wedi eu hawdurdodi i rannu'r wybodaeth â hwy. Dim ond at ddiben cymhwysol fel y'i pennir yn adran 114(5) o Ddeddf 2005 y caniateir defnyddio'r wybodaeth.

Mae rheoliad 9 yn rhagnodi'r personau y mae Gweinidogion Cymru, at ddibenion adran 114(6) o Ddeddf 2005, wedi eu hawdurdodi i rannu'r wybodaeth â hwy.

Mae rheoliad 10 yn gwahardd datgelu gwybodaeth ymhellach gan unrhyw bersonau y cyflenwyd gwybodaeth iddynt o dan y Rheoliadau hyn, yn ddarostyngedig i'r eithriadau pan fo'r wybodaeth wedi ei chyflenwi yn unol â gorchymyn llys, neu o dan ddarpariaethau Deddf neu offeryn statudol, neu fel rheol gyfreithiol.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth Uned Strategaeth y Gweithlu yn yr Adran Addysg a Gwasanaethau Cyhoeddus.

2017 Rhif (Cy.)

ADDYSG, CYMRU

**Rheoliadau Addysg (Cyflenwi
Gwybodaeth am y Gweithlu
Ysgolion) (Cymru) 2017**

<i>Gwnaed</i>	<i>2017</i>
<i>Gosodwyd gerbron Cynulliad Cenedlaethol Cymru</i>	<i>2017</i>
<i>Yn dod i rym</i>	<i>2017</i>

Mae Gweinidogion Cymru, drwy arfer y pwerau a roddir iddynt gan adrannau 114(1)(c), (2)(c), (3), (6) ac (8) a 120(2) o Ddeddf Addysg 2005(1), yn gwneud y Rheoliadau a ganlyn:

Enwi, cychwyn a chymhwyso

1.—(1) Enw'r Rheoliadau hyn yw Rheoliadau Addysg (Cyflenwi Gwybodaeth am y Gweithlu Ysgolion) (Cymru) 2017.

(2) Daw'r Rheoliadau hyn i rym ar [] 2017.

(3) Mae'r Rheoliadau hyn yn gymwys mewn perthynas ag ysgolion a gynhelir ac awdurdodau lleol yng Nghymru.

Dehongli

2.—(1) Yn y Rheoliadau hyn—

ystyr “athro cymwysedig neu athrawes gymwysedig” (“*qualified teacher*”) yw athro sydd wedi ei gymhwyso neu athrawes sydd wedi ei chymhwyso yn unol ag adran 132 o Ddeddf 2002;

mae i “athro neu athrawes ysgol” (“*school teacher*”) yr ystyr a roddir iddo yn Nhabl 1 ym mharagraff 1 o Atodlen 2 i Ddeddf 2014;

ystyr “awdurdod lleol” (“*local authority*”) yw'r awdurdod lleol sy'n cynnal yr ysgol;

(1) 2005 p. 18. Mae adran 114(10) o Ddeddf Addysg 2005 yn diffinio “prescribed” a “regulations”.

ystyr “cyfnod allweddol” (“*key stage*”) yw unrhyw un o’r cyfnodau a nodir ym mharagraffau (b) i (d) o adran 103(1) o Ddeddf 2002;

ystyr “cyfnod y cyfrifiad” (“*census period*”) yw’r cyfnod a bennir mewn cais am wybodaeth a wneir o dan y Rheoliadau hyn;

mae “cyfnod sylfaen” (“*foundation phase*”) i gael ei ddehongli yn unol ag adran 102 o Ddeddf 2002;

ystyr “cyfrifiad CYBLD” (“*PLASC census*”) yw’r cyfrifiad ysgolion blynyddol ar lefel disgyblion a gwblheir gan awdurdodau lleol mewn cysylltiad ag ysgolion yn eu hardal ac a gyflwynir i Weinidogion Cymru ar sail flynyddol yn unol ag adran 29 o Ddeddf 1996;

ystyr “y Cyngor” (“*the Council*”) yw Cyngor y Gweithlu Addysg y parheir â’i fodolaeth gan adran 2 o Ddeddf 2014;

ystyr “Deddf 1996” (“*the 1996 Act*”) yw Deddf Addysg 1996(1);

ystyr “Deddf 2002” (“*the 2002 Act*”) yw Deddf Addysg 2002(2);

ystyr “Deddf 2005” (“*the 2005 Act*”) yw Deddf Addysg 2005;

ystyr “Deddf 2014” (“*the 2014 Act*”) yw Deddf Addysg (Cymru) 2014(3);

ystyr “diwrnod gwaith” (“*working day*”) yw unrhyw ddiwrnod ac eithrio dydd Sadwrn, dydd Sul neu ddiwrnod sy’n wyl banc o fewn ystyr adran 1 o Ddeddf Bancio a Thrafodion Ariannol 1971(4) neu sy’n wyl gyhoeddus arall;

ystyr “dyddiad y cyfrifiad” (“*census date*”) yw’r dyddiad a bennir mewn cais am wybodaeth a wneir o dan y Rheoliadau hyn;

ystyr “y Ddogfen” (“*the Document*”) yw dogfen y gwneir darpariaeth, drwy gyfeirio ati, ar gyfer tâl ac amodau cyflogaeth eraill athrawon ysgol mewn gorchymyn a wneir gan yr Ysgrifennydd Gwladol o dan adran 122 o Ddeddf 2002;

ystyr “gweinyddwr y Cynllun Pensiwn Athrawon” (“*the administrator of the Teacher’s Pension Scheme*”) yw’r person sy’n arfer, yn unol ag erthygl 3 o Orchymyn Contractio Allan (Gweinyddu’r Cynllun Pensiwn Athrawon) 2003(5), y swyddogaethau a nodir yn y Gorchymyn hwnnw;

(1) 1996 p. 56.
(2) 2002 p. 32.
(3) 2014 dccc 5.
(4) 1971 p. 80.
(5) O.S. 2003/1668.

ystyr “meysydd dysgu” (“*areas of learning*”) yw’r meysydd dysgu a nodir mewn gorchymyn a wneir o dan adran 108(2)(a) o Ddeddf 2002(1);

ystyr “person cofrestredig” (“*registered person*”) yw person sydd wedi ei gofrestru yn y gofrestr a gedwir gan y Cyngor o dan adran 9 o Ddeddf 2014;

ystyr “pynciau” (“*subjects*”) yw’r pynciau a nodir yn adran 105(2) a (3) ac adran 106(2) a (3) o Ddeddf 2002.

Personau y caniateir cyflenwi gwybodaeth amdanynt

3. Nid yw’r Rheoliadau hyn yn gymwys ond mewn cysylltiad â gweithiwr cymhwysol(2) a hyfforddai cymhwysol(3)—

- (a) sydd, ar ddyddiad y cyfrifiad, yn cael ei gyflogi neu wedi ei gymryd ymlaen fel arall i weithio yn yr ysgol; neu
- (b) yn ystod cyfnod cyfan y cyfrifiad neu ran ohono—
 - (i) sy’n cael ei gyflogi neu ei gymryd ymlaen fel arall neu sydd wedi cael ei gyflogi neu ei gymryd ymlaen fel arall i weithio yn yr ysgol am o leiaf 28 o ddiwrnodau gwaith (“y cyfnod”); neu
 - (ii) a fydd wedi cwblhau’r cyfnod erbyn diwedd ei gontract.

Personau y gall fod yn ofynnol i berchennog ysgol neu awdurdod lleol gyflenwi gwybodaeth iddynt

4. At ddibenion adran 114(2)(c) o Ddeddf 2005, mae awdurdod lleol yn berson rhagnodedig.

Darparu gwybodaeth i awdurdodau lleol gan ysgolion a gynhelir ganddynt

5. Pan fydd yn cael cais oddi wrth awdurdod lleol, rhaid i berchennog(4) yr ysgol honno ddarparu i’r

-
- (1) Y Gorchymyn presennol yw Gorchymyn Addysg (Y Cwricwlwm Cenedlaethol) (Y Cyfnod Sylfaen) (Cymru) 2014 (O.S. 2014/1996 (Cy. 198)).
 - (2) Fel y diffinnir “qualifying worker” yn adran 113(2) o Ddeddf Addysg 2005.
 - (3) Fel y diffinnir “qualifying trainee” yn adran 113(3) o Ddeddf Addysg 2005.
 - (4) Mae i’r term “perchennog” yr ystyr a roddir i “proprietor” yn adran 579(1) o Ddeddf Addysg 1996. Mae’r adran honno yn darparu mai ystyr “proprietor”, mewn perthynas ag ysgol gymunedol, ysgol sefydledig neu ysgol wirfoddol, neu ysgol arbennig gymunedol neu sefydledig, neu ysgol feithrin a gynhelir, yw’r corff llywodraethu. Mae’r diffiniad o “proprietor” yn Neddf Addysg 1996 i gael ei ddarllen fel pe bai wedi ei gynnwys yn Neddf Addysg 2005 yn rhinwedd

awdurdod lleol hwnnw yr wybodaeth honno a nodir yn Atodlen 1 y gofynnir amdani mewn perthynas â—

- (a) gweithiwr cymhwysol; neu
- (b) hyfforddai cymhwysol.

Darparu gwybodaeth gan awdurdodau lleol i Weinidogion Cymru

6. O fewn 27 o ddiwrnodau gwaith i gael cais oddi wrth Weinidogion Cymru, rhaid i awdurdod lleol ddarparu i Weinidogion Cymru unrhyw wybodaeth—

- (a) sydd wedi ei gyflenwi i'r awdurdod lleol hwnnw o dan reoliad 5; neu
- (b) sydd wedi ei nodi yn Atodlen 1 y gofynnir amdani mewn perthynas ag—
 - (i) gweithiwr cymhwysol; neu
 - (ii) hyfforddai cymhwysol.

Darparu gwybodaeth gan y Cyngor i Weinidogion Cymru

7.—(1) At ddibenion adran 114(1)(c) o Ddeddf 2005, mae'r Cyngor yn berson rhagnodedig.

(2) O fewn 27 o ddiwrnodau gwaith i gael cais oddi wrth Weinidogion Cymru, rhaid i'r Cyngor ddarparu i Weinidogion Cymru yr wybodaeth honno a nodir yn Atodlen 2 y gofynnir amdani mewn perthynas ag—

- (a) gweithiwr cymhwysol; neu
- (b) hyfforddai cymhwysol.

Personau y caniateir i Weinidogion Cymru gyflenwi gwybodaeth iddynt at ddibenion cymhwysol

8.—(1) At ddibenion adran 114(3) o Ddeddf 2005, mae'r canlynol yn bersonau rhagnodedig—

- (a) Prif Arolygydd Ei Mawrhydi dros Addysg a Hyfforddiant yng Nghymru;
- (b) yr Ysgrifennydd Gwladol;
- (c) gweinyddwr y Cynllun Pensiwn Athrawon;
- (d) awdurdod lleol yng Nghymru;
- (e) y Cyngor;
- (f) perchennog ysgol yng Nghymru;
- (g) swyddfa economeg y gweithlu⁽¹⁾; a
- (h) personau sy'n cynnal gwaith ymchwil sy'n ymwneud â gweithwyr cymhwysol neu

(1) adran 122(2) o Ddeddf 2005. Nid oes unrhyw ysgolion arbennig sefydledig yng Nghymru.
Corff anadrannol yw hwn a sefydlwyd gan Lywodraeth y DU. Fe'i hariennir gan yr Adran Busnes, Arloesi a Sgiliau.

hyfforddeion cymhwysol y gellir disgwyl iddo fod o fudd i'r cyhoedd.

(2) Caiff Gweinidogion Cymru ddarparu'r wybodaeth honno y cyfeirir ati yn Atodlen 1 ac Atodlen 2 mewn cysylltiad â phersonau sydd neu sydd wedi bod yn weithwyr cymhwysol neu'n hyfforddeion cymhwysol i unrhyw berson a ragnodir ym mharagraff (1).

Cyflenwi gwybodaeth gan Weinidogion Cymru i bersonau a oedd yn meddu ar yr wybodaeth honno yn gyfreithlon neu a allai fod wedi ei gwneud yn ofynnol i'r wybodaeth honno gael ei chyflenwi

9.—(1) At ddibenion adran 114(6) o Ddeddf 2005, mae'r canlynol yn bersonau rhagnodedig—

- (a) awdurdod lleol yng Nghymru;
- (b) perchennog yr ysgol lle—
 - (i) y mae'r gweithiwr cymhwysol yn gweithio neu i fod i ddechrau gweithio;
 - (ii) y mae'r hyfforddai cymhwysol yn hyfforddi neu i fod i dechrau hyfforddi; ac
- (c) Prif Arolygydd Ei Mawrhydi dros Addysg a Hyfforddiant yng Nghymru.

(2) Caiff Gweinidogion Cymru ddarparu unrhyw wybodaeth mewn cysylltiad â phersonau sydd neu sydd wedi bod yn weithwyr cymhwysol neu'n hyfforddeion cymhwysol i unrhyw berson a ragnodir ym mharagraff (1).

Gwahardd datgelu pellach

10. Ni chaiff unrhyw berson y cyflenwir gwybodaeth iddo yn rhinwedd y Rheoliadau hyn ddatgelu'r wybodaeth honno ymhellach ac eithrio yn unol â gorchymyn llys, deddfiad neu reol gyfreithiol.

Kirsty Williams

Ysgrifennydd y Cabinet dros Addysg, un o Weinidogion Cymru
Dyddiad

ATODLEN 1

Rheoliad 5

Darparu Gwybodaeth gan Ysgolion ac Awdurdodau Lleol

1. Yr wybodaeth a ganlyn am y person—

- (a) rhyw;
- (b) dyddiad geni;
- (c) rhif yswiriant gwladol;
- (d) enw llawn; ac
- (e) cyfeirnod swyddogol a neilltuwyd gan y Cyngor, pan fo cyfeirnod o'r fath ar gael⁽¹⁾.

2. Swydd y person a'r rôl neu'r rolau a gyflawnir gan y person.

3. A yw'r person wedi cyrraedd y safonau sy'n ofynnol ar gyfer cynorthwywyr addysgu lefel uwch a gyhoeddir gan Weinidogion Cymru o bryd i'w gilydd⁽²⁾.

4. Mewn cysylltiad â'r contract cyflogaeth neu'r contract am wasanaethau—

- (a) a yw'r person wedi ei gymryd ymlaen o dan gontract cyflogaeth neu gontract am wasanaethau ("y Contract");
- (b) y dyddiad y dechreuodd y Contract;
- (c) yr oriau a'r wythnosau (os oes rhai) y pennodd y Contract y mae rhaid eu gweithio; a
- (d) pan fo'n gymwys, y dyddiad y daeth y Contract hwnnw i ben neu y mae i fod i ddod i ben.

5. Pan fo'r person wedi ei gymryd ymlaen ar gontract cyflogaeth neu gontract am wasanaethau er dyddiad y cyfrifiad blaenorol neu er diwedd cyfnod y cyfrifiad blaenorol, manylion cyflogaeth neu fel arall y person hwnnw yn union cyn y dechrau hwnnw, os ydynt yn hysbys.

(1) Neilltuir y cyfeirnod swyddogol i berson cofrestredig gan Gyngor y Gweithlu Addysg ac mae'n cael ei gofnodi gan y Cyngor yn y gofrestr yn rhinwedd paragraff 4 o Atodlen 2 i Reoliadau Cyngor y Gweithlu Addysg (Prif Swyddogaethau) (Cymru) 2015. Cynhelir y gofrestr gan Gyngor y Gweithlu Addysg yn unol ag adran 9 o Ddeddf Addysg (Cymru) 2014.

(2) Cyhoeddwyd y canllawiau cyfredol ym mis Medi 2011 ac maent wedi eu cynnwys yng nghylchlythyr 020/2011 sy'n dwyn y teitl "Safonau proffesiynol diwygiedig ar gyfer ymarferwyr addysg yng Nghymru". Mae copi o'r canllawiau ar gael yn www.learning.gov.wales.

6. Pan fo'r person wedi ei gyflogi neu yn cael ei gyflogi, neu wedi ei gymryd ymlaen neu yn cael ei gymryd ymlaen i weithio, mewn cyfnod o gyflogaeth di-dor, y dyddiad y dechreuodd y cyfnod hwnnw.

7. Tâl y person gan gynnwys, pan fo'n gymwys—

- (a) y cyflog blynyddol;
- (b) yr ystod cyflog(1) sy'n gymwys i'r person hwnnw;
- (c) safle'r cyflog blynyddol ar unrhyw ystod cyflog gymwys;
- (d) a yw unrhyw ran o'r cyflog blynyddol wedi ei diogelu o fewn ystyr Rhan 5 o'r Ddogfen;
- (e) a yw cyfradd cyflog ddyddiol yn daladwy(2); ac
- (f) unrhyw daliadau ychwanegol(3) y darperir ar eu cyfer gan y Ddogfen neu gan god sy'n cyfleu'r wybodaeth honno.

8. Mewn perthynas â'r addysgu a gyflawnir gan y person ("P")—

- (a) y meysydd dysgu neu'r pynciau a addysgir gan P;
- (b) a yw P yn addysgu'r cyfnod sylfaen;
- (c) a yw P yn addysgu'r cyfnodau allweddol ac os felly, pa gyfnodau allweddol;
- (d) a yw P yn addysgu meysydd dysgu neu bynciau drwy gyfrwng y Gymraeg ac eithrio maes dysgu datblygu'r Gymraeg neu'r Gymraeg fel pwnc;
- (e) blwyddyn ysgol y cwricwlwm cenedlaethol a addysgir gan P;
- (f) yr enw a roddir i'r dosbarth ysgol gynradd gan y pennaeth at ddiben nodi'r dosbarth hwnnw ac sy'n cael ei gynnwys yn y cyfrifiad CYBLD a pha ddosbarth a addysgir gan P; ac
- (g) faint o ddysgu y mae P wedi ei ddarparu neu y disgwylir iddo ei ddarparu yn yr ystafell ddosbarth yn ystod y cyfnod o saith niwrnod

(1) Mae'r ystodau cyflog cymwys presennol ar gyfer athrawon ysgol wedi eu nodi yn y Ddogfen, sef y brif ystod cyflog (gweler adran 13 o'r Ddogfen), yr ystod cyflog uwch (gweler adran 14 o'r Ddogfen) neu'r ystod cyflog ar gyfer ymarferwyr arweiniol (gweler adran 9 o'r Ddogfen).

(2) Mae paragraff 43 o'r Ddogfen a gyhoeddwyd gan yr Adran Addysg ym mis Medi 2016 yn datgan bod rhaid talu athrawon sy'n cael eu cyflogi o ddydd i ddydd neu ar sail byr rybudd arall yn unol â darpariaethau'r Ddogfen ar sail ddyddiol a gyfrifir ar y rhagdybiaeth bod blwyddyn waith lawn yn 195 o ddiwrnodau, ac y cyfrifir cyfnodau cyflogaeth o lai na diwrnod ar sail pro rata. Mae'r Ddogfen yn cael ei diweddarau gan yr Ysgrifennydd Gwladol yn flynyddol.

(3) Mae paragraff 26 o'r Ddogfen a gyhoeddwyd gan yr Adran Addysg ym mis Medi 2016 yn gwneud darpariaeth ynghylch taliadau ychwanegol.

sy'n dechrau ar y dydd Llun yn union cyn dyddiad y cyfrifiad.

9. Mewn cysylltiad â hyfforddai cymhwysol sy'n dilyn cwrs neu raglen hyfforddiant cychwynnol athrawon, y math o gwrs neu raglen.

10. Pan fo'r person yn absennol ar ddyddiad y cyfrifiad, y ffaith ei fod yn absennol.

11. Mewn cysylltiad â phob achlysur y bu athro neu athrawes ysgol yn absennol o'r gwaith ar unrhyw adeg yn ystod cyfnod y cyfrifiad neu ar ddyddiad y cyfrifiad—

- (a) y rheswm dros yr absenoldeb; a
- (b) ar gyfer y cyfnod absenoldeb hwnnw, y diwrnod cyntaf a, pan fo'n gymwys, y dyddiad olaf yr oedd yr athro neu athrawes ysgol yn absennol a nifer y diwrnodau gwaith a gollwyd.

12. Pan fo contract cyflogaeth neu gontract am wasanaethau y person ("P") wedi ei derfynu yn ystod cyfnod y cyfrifiad—

- (a) y rheswm dros y terfyniad hwnnw;
- (b) os yw'n hysbys, a yw P wedi sicrhau cyflogaeth bellach, ac os felly, ei lleoliad a'i math;
- (c) blynyddoedd ysgol y cwricwlwm cenedlaethol a addysgwyd gan P yn ystod y cyfnod cyfrifiad hwnnw; a
- (d) os yw'n hysbys, nifer y blynyddoedd o brofiad addysgu a enillwyd gan P er dod yn athro cymwysedig neu athrawes gymwysedig ar yr adeg y terfynwyd swydd P.

13. Pa un a yw'r person yn gallu addysgu drwy gyfrwng y Gymraeg ai peidio.

14. Lefel sgiliau Cymraeg person.

15. Mewn cysylltiad â phob swydd wag ar gyfer staff addysgu yn yr ysgol a hysbysebwyd yn ystod cyfnod y cyfrifiad—

- (a) a yw'r swydd wag wedi ei llenwi;
- (b) os yw'r swydd wag wedi ei llenwi, y dyddiad y penodwyd person i'r swydd;
- (c) os nad yw'r swydd wag wedi ei llenwi, y rheswm pam na chafodd ei llenwi;
- (d) teitl y swydd ar gyfer y swydd wag;
- (e) y meysydd dysgu y bydd yn ofynnol i ymgeisydd llwyddiannus eu haddysgu;
- (f) y pynciau y bydd yn ofynnol i ymgeisydd llwyddiannus eu haddysgu;

- (g) y cyfnodau allweddol y bydd yn ofynnol i'r ymgeisydd llwyddiannus eu haddysgu;
- (h) blwyddyn ysgol y cwricwlwm cenedlaethol y bydd yn ofynnol i'r ymgeisydd llwyddiannus ei haddysgu;
- (i) a yw'r gallu i addysgu drwy gyfrwng y Gymraeg yn ofynnol ar gyfer y swydd wag;
- (j) nifer y ceisiadau a gafwyd am y swydd wag; a
- (k) y dyddiad y cafodd y swydd wag ei hysbysebu gyntaf.

Darparu Gwybodaeth gan y Cyngor

1. Yr wybodaeth a ganlyn am y person cofrestredig—

- (a) rhyw;
- (b) dyddiad geni;
- (c) rhif yswiriant gwladol;
- (d) enw llawn;
- (e) grŵp ethnig;
- (f) hunaniaeth genedlaethol; a
- (g) cyfeirnod swyddogol a neilltuwyd gan y Cyngor, pan fo cyfeirnod o'r fath ar gael.

2. A oes gan y person cofrestredig anabledd o fewn ystyr adran 6 o Ddeddf Cydraddoldeb 2010(1), os yw'n hysbys.

3. Mewn cysylltiad ag athro neu athrawes ysgol sydd wedi cwblhau cwrs hyfforddiant cychwynnol athrawon yn llwyddiannus—

- (a) enw'r sefydliad sy'n darparu'r cwrs;
- (b) teitl y cwrs neu ddisgrifiad ohono;
- (c) y pwnc neu'r pynciau a astudiwyd gan yr athro neu athrawes ysgol; a
- (d) oedran y disgyblion y lluniwyd y cwrs i baratoi'r athro neu athrawes ysgol i'w haddysgu.

4. Mewn cysylltiad ag athro neu athrawes ysgol, datganiad ynghylch pa un a yw'r Cymhwyster Proffesiynol Cenedlaethol ar gyfer Prifathrawiaeth wedi ei ddyfarnu i'r person hwnnw ai peidio, ac os felly, dyddiad y dyfarniad.

5. Mewn cysylltiad â pherson cofrestredig a gymhwysodd yn athro neu athrawes ysgol ac eithrio drwy gwblhau cwrs hyfforddiant cychwynnol athrawon yn llwyddiannus—

- (a) y math o raglen hyfforddi a gwblhawyd;
- (b) enw'r ysgol neu'r sefydliad lle y cyflawnwyd yr hyfforddiant ar gyfer athrawon ysgol; ac
- (c) y dyddiad y cwblhawyd y rhaglen hyfforddi.

6.—(1) Mewn cysylltiad ag athro neu athrawes ysgol sydd wedi bwrw cyfnod sefydlu neu ran o gyfnod sefydlu, pa un a yw hynny yng Nghymru neu Loegr—

- (a) enw'r corff priodol;

(1) 2010 p. 15.

- (b) y dyddiad y dechreuodd yr athro neu athrawes ysgol y cyfnod sefydlu;
- (c) pan fo'n gymwys, nodyn bod yr athro neu athrawes ysgol wedi cwblhau'r cyfnod sefydlu yn llwyddiannus, a dyddiad ei gwblhau;
- (d) pan fo'n gymwys, nodyn bod cyfnod sefydlu'r athro neu athrawes ysgol wedi ei estyn, a chyfnod yr estyniad;
- (e) pan fo'n gymwys, nodyn mai dim ond rhan o gyfnod sefydlu y mae'r athro neu athrawes ysgol wedi ei chwblhau, a'r cyfnod a fwriwyd; ac
- (f) pan fo'n gymwys, nodyn bod y person wedi methu â chwblhau'r cyfnod sefydlu yn llwyddiannus.

(2) Mewn cysylltiad ag athro neu athrawes ysgol nad yw wedi bwrw cyfnod sefydlu—

- (a) a yw'r athro neu athrawes ysgol yn esempt o'r gofyniad i fwrw cyfnod sefydlu, ac os felly, y rheswm dros yr esemptiad; neu
- (b) a oedd gofyniad i'r athro neu athrawes ysgol fwrw cyfnod sefydlu ar yr adeg berthnasol.

7. Pan fo'n hysbys, yr wybodaeth a ganlyn mewn cysylltiad â chymwysterau sydd gan berson cofrestredig—

- (a) dyddiad dyfarnu'r cymhwyster;
- (b) enw'r cymhwyster;
- (c) y sefydliad a ddyfarnodd y cymhwyster;
- (d) dosbarth y radd neu'r cymhwyster; ac
- (e) y pwnc.